

COLUMNNA

Regurdientschas faussas?

BENEDETTO VIGNE

Dacurt ha *Peder Antona Baltermia* scrit per la FMR in pitschen bel essay davart la schlieusa ubain il stadal, sco ils Sursetters numnan il vegl med da transport invernal d'in temp passà. Ed en quest connex ma vegn endament in'anecdota persunala, u respectiv dus fatgs capitads cur che jau aveva dus u trais onns. Uss pon ins sa dumandar schebain la memoria sa anc sa regurdar enavos da tala guisa, ma crajai'm, qua datti anc auters eveniments regurdads en moda incredibla. Lezza giada gievi per mal ils dents, dents da latg sa chapescha. Sto esser che l'igièna dentala era detg manglusa quels emprims onns tschuncanta.

Duas giadas eri capità ch'jau aveva enormas dolurs. Ina giada avevan ils mes clamà il medi da la val, lez mument era quai in docter Vasella, probabel oriund Puschlavin. Quel era oramai arrivà tar nus e m'aveva mess en pes sin ina sutga bel amez ustaria – nus avevan lez temp ina da las trais ustarias da Salouf – el aveva piglià nanavant ina zanga e dai, or cun il smaladet dent. Insacura ma resti anc insatge pauc regur-



dientschas da temas e da sanganadas. Ma il rest è svani.

L'autra giada ch'in dent ma duleva eri capità da bel mez enviern. I bischava da nar ed igl era nunpussivel da charrar cun autos, lura anc fitg rars, sin quella via naventadas. Uschia che barba Peder – il bab da Peder Antona (ma lez n'era lura betg anc naschi) – ha stuì metter sut ses chaval, forse eri gia la Fanni, sut la schlieusa e ma manar cun quella direct a l'ospital a Savognin. I ma resta be in unic maletg, jau sin il banchin da la schlieusa, probabel senza sporta, ina cuvria da launa, dolurs al dent e fradaglias a mauns e pes, nus sin via giudim la Nigidera, tras la bischa lung la Gelgia. Da la tirada dal dent na ma regorda betg pli.

Tut be reminiscenzas faussas? Anc in'otra datti or da quella fasa ultratempriva da mia vita, in regord che n'ha però da far nagut cun dents marschs. Jau sun naschi il settember 1951. Il lai artificial da Marmorera è vegnì construì enturn lezs onns. Jau ma regord d'avair fatg cun ils mes – tgi ch'era tut da la partida na saja pli – in'excursiun si enten il café (existiva quel gia?) sur il lai a guardar la construcziun dal rempar. Probabel cun la posta. Anc ves jau las ruinas da la vischnanca bandunada, ed anc ma para da vesair las valzas a stagnar il rempar natural. Il lai n'era damai betg anc emplenì, Marmorera betg anc najentada. Quai sto esser stà il 1953, jau strusch dus onns. Turnar a chasa avevans dal reminent pudì cun l'auto da Pol Casparin, ch'era casualmain sin sia tura da pasterner. Jau rambottel davosen en quai combi u caravan sin il tablar dal paun, oramai vid. Savur anc uss l'odur da paun frestg.

Ma forse che la memoria m'engiona tuttina in zic, ma maina litteralmain per il nas ...

Benedetto Vigne da Turitg è autor e schurnalist liber.